



02.11.2018

UKA 2018/171

Naqqiut

Siunnersuut 30. juli 2018-meersoq taarserpaa

(Makku naqqiutigineqarput siunnersuuteqartup atia (Inatsisartunut ilaasortaq Sara Olsvig, Inuit Ataqatigiit) taarserneqarpoq (Inuit Ataqatigiit Inatsisartuni ilaasortaaitai))

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Meeqqat inuusuttullu sumiginnagaasut ikilisinniarlugit nuna tamakkerlugu iliuusissatut pilersaarummik kingusinnerpaamik UKA2019-mi saqqummiunneqartussamik Naalackersuisut suliaqarnissaat pillugu Inatsisartuni aalajangiiffigisassatut siunnersuut.

(Inuit Ataqatigiit Inatsisartuni ilaasortaaitai)

Tunngavilersuut:

Isumaginninnermut tunngasuni suliniuterparpassuit pitsaasut ingerlapput. Ukiupaalunngortuni Naalackersuisuni nikerartuni meeqqat inuusuttullu annertuumik sammivavut. Tamanna pitsaavoq nangittariaqarlunilu. Sulili pitsaanagerusumik ingerlassinnaavarput. Kisitsisit paatsuugassaannngilluinnarput. Naalackersuisut 2017-imi meeqqanut inuusuttunullu susassaqaqfinni suliat amerlassusaat pillugit nassuiaat naapertorlugu kommunini sulianik ingerlatsisuni ataasiakkaani suliassat amerlavallaarujussuartut suli uninngaannarput, meeqqalli amerlasoorpassuit suli angajoqqaaminnik sumiginnarneqarnerannik kisitsisit suli aarlerinarnerupput.

Taamaammat unammillernartitanut tamakkiisumik isiginittaaseqarnissaq siunertaralugu suliniuteqarnissaq aallartittariaqarparput. Meeraq sumiginnagaasoq aamma atuarfimmittarpoq, peqqissaasumiittarluni, arsaattartut klubianniittarluni ajornerpaagaangallu politiit aamma ulluinnarmini naapissinnaasarlugit. Kikkut tamarmik suliannik ataqatigiissaarissapput, kikkullu tamarmik pineqartumik kivitseqataassapput, taamaalilluni suliniutit susassaqaqfiit assignngitsut akimorlugit ingerlanneqarsinnaaqullugit.

Inuit Ataqatigiit ilaqutariit iluitsuutillugit aallunnissaat kissaatigaat. Tamatuma siusissukkut iliuuseqarneq qulakkiissavaa, pinaveersaartitsinerlu pitsaanerusumik ingerlanneqarluni. Naggataagummi unammillernartitat ilaqutariinni ataasiakkaani pilersarput, tassaniliuna pinaveersaartitsinerit misileqqaartariaqarivut.

Taamaammatt aamma suliffeqarnermut tunngasut isumaginninnikkullu ikiorseeriaatsit ilaqutariinnut aarlerinartorsiortut pingaaruteqarput.

Isumaginninnikkut aarlerinartorsiortut meeqqallu sumiginnakkat pillugit pinaveersaartitsinermi iluatsitsinissatsinni nuna tamakkerlugu iliuusissatut pilersaarut, Naalackersuisut tamarmik suleqatigiillutik naalackersuisoqarfiillu tamaviisa suleqatigalugit ataqatigiissaarillutillutillu suliaqarnissaat pingaarutilerujussuuvoq. Tamatumanittaarlu susassaqaarfiit akimorlutik sulianik aaqqissuussinissaat pingaaruteqarluinnarpoq. Tamannalu nuna tamakkerlugu pilersaaruteqarnerup qulakkiissavaa.

Kommunit attuumassuteqartullu allat suliamut ilanngunneqarnissaat ilanngullugu kaammattuutigerusupparput. Kommunit attuumassuteqartullu allat susassaqaarfiit akimorlugit suleqatigiinnissamut piuumassuseqartorujussunerat misilittakkatta takutippaa.

Isumaginninnikkut politikimi iluatsilluartumik ingerlatsinermi Inuit Ataqatigiit siusinaarluni iliuuseqarneq , pinaveersaartitsineq, susassaqaartullu akimorlutik suleqatigiinnerat pingaartipparput. Ilaqutariit iluitsuusutut sullisissavavut, meeqqanillu sumiginnaasarneq pimoorussamik ilungersortumik iliuuseqarfigissavarput.

Amerlaqaagut meeqqat nunatsinni isumalluutini pingaarnerpaajunerat pillugu isumaqatigiittugut. Susassaqaartut akimorlutik suleqatigiinnerat iluatsinngikkutsigu meeqqallu inuusuttullu sumiginnarneqartut pillugit nuna tamakkerlugu iliuusissatut pilersaarummik isumaqatigiissuteqarnata, tamanna iliuuseqarani oqaluinnarnerussaaq.

Taama oqaaseqarluta siunnersuut Inatsisartunut suliassanngortipparput.

Pisortanut aningaasatigut allaffissornikkullu kingunerisassai:

Naalackersuisoqarfiit tamarmik nuna tamakkerlugu iliuusissamut tapeeqataassapput, taamaammallu susassaqaartut akimorlugit suleqatigiinnerup pilersaaruserlugulu ataqatigiissarnissaa pisariaqassaaq. Iliuusissatut pilersaarummik Naalackersuisunit akuerineqartussamik suliaqarnermi allaffissornikkut isumalluutit ataatsimut atorneqartut A/C fuldmægtigip ukioq kaajallallugu sulineratut aningaasartuutaanissaat naatsorsuutigineqassaaq, tassa 500.000 koruunit.

Nuna tamakkerlugu pilersaarutit siunnersutigineqartup atuutilersinneqarnissaa ungasinnerusumullu sammisumik aningaasalersuinnikkut ikorfaqartinnissaa aningaasaqarnikkut allaffissornikkullu isumalluutit atuinermik nassataqassaaq. Iliuusissatut pilersaarutissatut siunnersuut takutinnagu taakku annertussusilerneqarsinnaanngillat. Iliuusissatulli pilersaarummi pilersaarummik ikorfiinissaq

qulakkeerniarlugu aningaasatigut allaffissornikkullu isumalluutit qanoq annertugisut
immikkoortinneqarnissaat ilanngunneqassaaq.

Namminersortunut aningaasaatigut allaffissornikkullu kingunerisassai:

Soqanngilaq

Innuttaasunut aningaasatigut allaffissornikkullu kingunerisassai:

Soqanngilaq